

süß Wasser vnder einander/ geworffen/ also bald haben sich die Ael an die Wärme gehenckt/ wann nun ich solches empfunden / hab ich die Ael also an den Wärmen hangende/ auff das Gestad vnd Land hinaus geschlenckt/ vnnnd sie darnach geschwind/ mit den Händen gefangen/ selbige Ael sindt aber nicht groß/ auch nicht sonders gut vnnnd vbel zu vertäwen.

Von dem Neünaugen.

Der Neünaugen seynde zweyerley/ die grösseren kössen auß dem Meer heissend Lampetra, Französisch Lamproye Ital. Lampreda Hisp. Lamprea, teütsch ein Neünaug ein prycke/ niderländisch Lampreit/ oder een prycke/ dise weil sie bey vns nicht gesehen oder gefunden werden / will ich darvon zuschreiben auch vnderlassen.

In den Rhein vnnnd andere Flüsß in Teütschland kommen sie wohl/ sagt auch Colerus, daß er ein Herzen Fisch vnd mechtig Anmutig zuesset/ vnd daß er vmb Iacobi bis in die Fasten gut seye/ darnach sollen sie verderben/ aber in der Chur-Brandenburg/ werden sie an der Oder vnnnd Freyenwald/ in selbem langen Strich der Oder/ acht Tag nach Martini gefangen / man gebe das Schock (ein Schock ist 5. Dohet oder 60. an der Zahl) vmb 6. 7. oder 8. Groschen.

Die aber so bey vns gefunden werde/ heissent bey den Lateinern Lampreda minima, Französich / Lamprüons oder Lamprillons bey Tholosa Chathillous, à titillatione, von dem kühlen / dann so man sie in Händen haltet/ winden sie sich in vil weg/ bis sie ledig werden/ man isset sie gebachen vnnnd gesotten / nimbt sie auch nicht auß von dem Eingeweyd.

Diser Fisch ist nicht vngleich/ an der Gestalt vnnnd Grösse/ dem gemeinen Blindenschleicher / ist auß dem Geschlecht der Lampreten, von den 7. Löchern der Fischohren/ vnd 2. Augen wirdt er Neünaug genant/ solcher sollend zweyerley Gestalt seyn/ namblich das ander von dem Raat oder Ruor/ Ruor Neünaug genant / in welches sie verhalten lebend schwerer dann die anderen/ sollen nicht in die Speiß kommen / solche Fisch habend auff dem Koyff ein Loch als die anderen Lampreden, man sagt/ so ein kleiner Neünaug in einem irdenen Geschir in Wasser gesotten werde/ daß der Haffen zerspringe. man facht sie auff vnderschieden